

# ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ԶՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ  
P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: [prelacy@armenianprelacykw.org](mailto:prelacy@armenianprelacykw.org)

ՆՈՐ ՇՐՋԱՆ, Է. Տարի, Թիւ 293, Ուրբաթ, 24 ՅՈՒԼԻՍ, 2015

ՀԱՅԿԱԿԱՆ

## Ն.Ս.Օ.Տ.Տ. ԱՐԱՄ Ա. ԿԱԹՈՂԻԿՈՍԻ ՆԵՐԿԱՅՈՒԹԵԱՄԲ ՀԱՅՈՑ ՑԵՂԱՍՊԱՆՈՒԹԵԱՆ 100- ԱՄԵԱԿԻՆ ՆՈՒԻՐՈՒԱԾ ԵՐԱԺՇՏԱԿԱՆ ԵՐԵԿՈՑ

Կիրակի, 19 Յուլիս 2015-ի երեկոյեան ժամը 8:00-ին, Մեծի Տանն Կիլիկիոյ Կաթողիկոսութեան 100-ամեակի նուիրուած Սրբալոյս Միւռնի օրհնութեան, եկեղեցական արարողութիւններուն եւ ձեռնարկներուն համար աշխարհի չորս կողմերէն Լիբանան ժամանած ուխտաւորները եւ Լիբանանի երաժշտասէր հանրութիւնը լեցուցած էին Պիքաֆայայի Սուրբ Աստուածածին Վանքի շրջափակը: Անոնք եկած էին ունկնդրելու եւ ըմբոշխնելու հայ երաժշտութիւնը:



Հանդիսութիւնը կը հովանաւորէր Ն.Ս.Օ.Տ.Տ. Արամ Ա. Կաթողիկոսը եւ կը նախագահէր Ազգային Բարերար Տէր եւ Տիկ. Ալեքքօ Պէզիքեան: Ներկայ էին Կաթողիկոսութեան 100-ամեակի ձեռնարկներուն հրաւիրուած եկեղեցիներու հոգեւոր պետերը եւ ներկայացուցիչները, որոնք ժամանած էին, Միջին Արեւելքէն, Եւրոպայէն, Ափրիկէէն, Հիւսիսային ու Հարաւային Ամերիկաներէն եւ Հնդկաստանէն:

Պէրոյթի սիմֆոնիք նուագախումբ ղեկավարութեամբ մայսթրօ Յարութ Ֆազլեանին մեկնաբանեց Արամ Խաչատրեանի եւ այլ հայ երաժիշտներու գործերը: Երեկոն յատուկ հմայք ստացաւ երբ աշխարհահռչակ սփրանօ Յասմիկ Պապեան եւ թենոր Բարսէղ Թումանեան իրենց թովիչ ձայներով հմայեցին հանդիսականները: Սուրբ Աստուածածին Վանքի Հայոց Ցեղասպանութեան երկնասլաց յուշարձանը, որուն հովանիին տակ տեղի ունեցաւ համերգը, կարծէք միջնորդ կը հանդիսանար դէպի երկինք փոխանցելու Հայոց Ցեղասպանութեան նահատակներու յիշատակը պանծացնող հայ հանճարներուն ստեղծագործութիւնները: Արդարեւ, պատմութիւնը վկայ եղաւ, որ հայ ժողովուրդի ստեղծագործ ոգին է, որ յաղթահարեց ու կը շարունակէ յաղթահարել պատմութեան բոլոր ոսոխներուն: Շուրջ մէկ ու կէս ժամ տևող համերգի աւարտին ներկայ հազարաւոր ժողովուրդը յորդնակա ծափողոյններով գնահատեց նուագողներուն ու մենակատարներուն բացառիկ կատարողութիւնը:

Երաժշտական երեկոյին փակումը կատարելով, Վեհափառ Հայրապետը իր գնահատանքը յայտնեց սիմֆոնիք նուագախումբի ղեկավար մայսթրօ Յարութ Ֆազլեանին, աշխարհահռչակ երգչուհի եւ երգիչ Յասմիկ Պապեանին եւ Բարսէղ Թումանեանին, ինչպէս նաեւ նուագախումբի

բոլոր անդամներուն, որոնք հայ երաժշտութեան առթած յուզմունքներով ու խոյանքներով լիցքաւորեցին ներկաները:

Ապա, Նորին Սրբութիւնը բեմ հրաւիրեց Սուրբ Աստուածածին Վանքի նահատակաց ու վերածննդեան յուշարձանի համալիրի, Թոչնոց Բոյնի Հայոց Յեղասպանութեան «Արամ Պեղիքեան» Որբերու թանգարանի եւ Անթիլիասի Նահատակաց մատրան բարերար Տէր եւ Տիկին Ալեքքօ եւ Անի Պեղիքեանը, ընտանիքի անդամներով: Բարձր գնահատելէ ետք Պեղիքեան ընտանիքի իշխանական բարերարութիւնը՝ Մեծի Տանն Կիլիկիոյ Կաթողիկոսութեան ճամբով հայ



ժողովուրդին, «Ասպետ»ի կարգի շքանշանով պարգեւատրեց Տիար Զարեհ Պեղիքեանը (յայտնենք որ մի քանի տարիներ առաջ Վեհափառ Հայրապետը «Իշխան»ի կարգի շքանշանով պարգեւատրած էր Տիար Ալեքքօ եւ Անի Պեղիքեանը): Նորին Սրբութիւնը նաեւ գնահատանքով անդրադարձաւ Կաթողիկոսարանի Կալուածոց յանձնախումբի կատարած աշխատանքին, որ մօտէն եւ կամաւոր կերպով հետեւած էր ընդհանրապէս Կաթողիկոսարանի շինարարական աշխատանքներուն եւ յատկապէս վերոնշեալ շինարարութիւններուն, եւ ապա, «Ս. Մեսրոպ Մաշտոց» շքանշանով պարգեւատրեց ճարտարապետներ Վահէ Գալինճեանը եւ Վազգէն Զեքիճեանը (յայտնենք որ Վեհափառ Հայրապետը պարգեւատրած էր նոյն յանձնախումբի անդամներէն ճարտարապետ Յակոբ Աթէշեանը եւ 2006-ին ճարտարապետ Յակոբ Շամլեանը):

## **Ն.Ս.Օ.Տ.Տ. ԱՐԱՄ Ա. ԿԱԹՈՂԻԿՈՍ ԲԱՅՈՒՄԸ ԿԱՏԱՐԵՑ ՀԱՅՈՑ ՅԵՂԱՍՊԱՆՈՒԹԵԱՆ ՈՐԲԵՐՈՒ «ԱՐԱՄ ՊԵՋԻՔԵԱՆ» ԹԱՆԳԱՐԱՆԻՆ**



Շաբաթ, 18 Յուլիս 2015-ի առաւօտեան ժամը 11:00-ին, Ն.Ս.Օ.Տ.Տ. Արամ Ա. Կաթողիկոս, ընկերակցութեամբ Լիբանան ժամանած օտար եկեղեցիներու հոգեւոր պետերուն եւ ներկայացուցիչներուն եւ Մեծի Տանն Կիլիկիոյ թեմակալ առաջնորդներուն ու Միաբան Հայրերուն, ժամանեց Կաթողիկոսութեան խնամքին ներքեւ գործող «Թոչնոց Բոյն» հաստատութիւնը, ժրպէյլ, կատարելու Հայոց Յեղասպանութեան Որբերու «Արամ Պեղիքեան» թանգարանի բացումը:

Բացման հանդիսութեան ներկայ էին նաեւ Մարոնի եկեղեցոյ Բաբի Պատրիարքը, Լիբանանի Վարչապետին եւ Խորհրդարանի Նախագահին ներկայացոցիչը՝ Լիբանանի Մշակոյթի Նախարար Տիար Բնի Արայժի, Լիբանանի քրիստոնէայ համայնքները ներկայացնող շարք մը հոգեւոր առաջնորդներ, Հայաստանի Հանրապետութեան Սփիւռքի Նախարար Հրանուշ

Յակոբեան, պետական անձնաւորութիւններ, Ժրպէյլի քաղաքապետ Զիյատ Հաուաթ, թանգարանի բարերար՝ Պէզիքեան ընտանիքի անդամներ, ազգայիններ, «Թոչնոց Բոյնի» մէջ պատասպարուած նախկին որբեր եւ հոծ թիւով հայ ժողովուրդի զաւակներ:

Բացման խօսքը արտասանեց «Թոչնոց Բոյնի» ինամակալութեան ատենապետ Տիկ. Սեդա Խտրշեան: Ան հակիրճ ներկայացուց պատմականը Դանիական եկեղեցիներու նախաձեռնած մարդասիրական հիմնարկին, անդրադառնալով «Թոչնոց Բոյնի» հիմնադիր Մարիա Ճէզրպարնի՝ «Մամա»ին որբահաւաքի անձնուէր առաքելութեան ու անոր թողած վաստակին հայ որբախնամութեան աշխատանքին մէջ: Վերջապէս, Տիկ. Խտրշեան բացատրութիւն տուաւ թանգարանի իրագործուած աշխատանքներուն ու նպատակին մասին:



Թանգարանի բարերար Ալեքքօ Պէզիքեան խօսք ասնելով յայտնեց, թէ իր հայրը Հայոց Յեղասպանութեան արհաւիրքէն ճողոպրած հազարաւոր որբերէն մին եղած է, որ պատասպարուած է այս մարդասիրական հաստատութենէն ներս: Յուզումնախառն ձայնով ան ըսաւ, թէ իրեն համար բարոյական պարտաւորութիւն էր այս բարերարութեան ճամբով նախ, իր երախտագիտութիւնը յայտնելու հաստատութեան բոլոր անձնուէր ծառայողներուն եւ ապա, իր հօր յիշատակին ընդմէջէն յարգելու բոլոր որբերը, որոնց դերը հսկայական եղաւ հայ ժողովուրդի գոյատեւման մէջ:

Ժրպէյլի քաղաքապետ Զիյատ Հաուաթ խօսեցաւ «Թոչնոց Բոյն» հաստատութեան կարեւորութեան մասին եւ դրուատիքով արտայայտուեցաւ շրջանէն ներս ապրող հայ ժողովուրդին բերած ներդրումին՝ պատմական Պիպլոս (Ժրպէյլ) քաղաքի զարգացման ու բարգաւաճման գործին: Քաղաքապետը նաեւ վստահեցուց, թէ նորակառոյց այս թանգարանը յատուկ տեղ պիտի գրաւէ Ժրպէյլի զբօսաշրջիկութեան ծրագիրներէն ներս:

Խօսք առաւ Մշակոյթի Նախարար Բոնի Արայժի, որ նաեւ կը ներկայացնէր Լիբանանի Խորհրդարանի Նախագահ Նեպիհ Պրրին եւ Վարչապետ Թամմամ Սալամը: Հայաստանի Հանրապետութեան Նախագահ Տիար Սերժ Սարգսեանի խօսքը ընթերցեց Հայաստանի Հանրապետութեան Սփիւռքի Նախարար Հրանուշ Յակոբեան:

Մարոնի եկեղեցւոյ Բաի Պատրիարք, որ նախքան պատրիարք ընտրուիլը երկար տարիներու առաջնորդն էր Ժրպէյլի Մարոնի համայնքին, յայտնեց թէ ինք լաւ կը ճանչնայ այս հաստատութիւնը եւ անոր տարած մարդասիրական գործունէութիւնը, շեշտելով թէ մարդասիրական ծրագիրներու հովանաւորութիւնը եկեղեցւոյ առաքելութեան անբաժան մասն է: Պատրիարքը նաեւ անդրադարձաւ Լիբանանի հայ համայնքին կարեւորութեան՝ իբր անբաժան մասը լիբանանեան ընկերութեան, եւ իր ունեցած եղբայրական յարաբերութեան Ն.Ս.Օ.Տ.Տ. Արամ Ա. Վեհափառ Հայրապետին հետ: Վերջապէս, Պատրիարքը յիշեց Հայոց Յեղասպանութիւնը, նշելով թէ Լիբանանի ժողովուրդը անմասն չէր մնացած Օսմանեան պետութեան սփռած արհաւիրքէն եւ ան եւս ենթարկուած էր սովի ու կոտորածներու: Պատրիարքը եզրափակեց ըսելով, թէ դժբախտաբար այսօր եւս պատմութիւնը ինքզինք կը կրկնէ Միջին Արեւելքէն ներս:

Վեհափառ Հայրապետը խօսք առնելով գնահատեց «Թռչնոց Բոյն»ի առաքելութեան հաւատացող բոլոր անձնուէր ծառայողները եւ բարերարները: Ապա, անդրադարձաւ Հայոց Յեղասպանութեան Որբերու «Արամ Պեղիքեան» թանգարանի իւրայատկութեան, վստահեցնելով թէ թանգարանի բացումը պարզապէս սկիզբ մըն է: Արխիւներու հաւաքման աշխատանքները պիտի շարունակուին եւ մեր յաջորդ քայլը պիտի ըլլայ ստեղծել ցեղասպանութեան ուսումնասիրութեան յատուկ կեդրոն մը: Ան գնահատեց Պեղիքեան ընտանիքը եւ բոլոր ճարտարապետներն ու մասնագէտները, որոնք իրականացուցին այս արդիական եւ պատուաբեր թանգարանին իրագործումը: Ողջունելով հոգեւոր պետերու եւ եկեղեցական ներկայացուցիչներու, դեսպաններու եւ պետական ու քաղաքական հիւրերու ներկայութիւնը, Նորին Սրբութիւնը իր գնահատանքը յայտնեց ըսելով, որ անոնք մասնակից կը դառնան Հայոց Յեղասպանութեան 100-ամեակին, գործնապէս իրենց զօրակցութիւնը յայտնելով հայ ժողովուրդի պահանջատիրական պայքարին: Եւ ապա, անդրադառնալով 100-ամեակի իմաստին ու պատգամին, Վեհափառ Հայրապետը ըսաւ, թէ թանգարանը մեր ժողովուրդին համար կոչ մըն է յիշելու մեր նահատակները ու իր հաւատարմութիւնը վերանորոգելու անոնց սրբազան կտակին նկատմամբ, միանգամայն՝ յիշեցնելու համայն մարդկութեան, թէ Հայոց Յեղասպանութեան ճանաչումը ու դատապարտումը հրամայական է՝ կանխելու համար այլ ցեղասպանութիւններ, ինչպէս նաեւ արդարութիւն պահանջելու ցեղասպան Թուրքիայէն:



Խօսելով թանգարանին մասին, Նորին Սրբութիւնը Հայոց Յեղասպանութեան որբերուն նուիրուած այս թանգարանը նկատեց կենդանի յիշատակարան մը մեր մէկուկէս միլիոն նահատակներուն, որոնք զոհը դարձան Օսմանեան Թուրքիոյ կողմէ ծրագրուած ու գործադրուած ցեղասպանութեան: Ան անելցուց ըսելով թէ «Թանգարանը նաեւ կենդանի յուշարար մըն է հազարաւոր որբերու, որոնք Լիբանանի մէջ խնամք ու դաստիարակութիւն ստացան՝ ամերիկեան, գոլիցերիական ու դանիական մարդասիրական կազմակերպութիւններու կողմէ: Թանգարանը խօսուն վկայութիւն մըն է այն նշանակալից դերին, զոր Լիբանանը ունեցաւ հայ ժողովուրդի վերածննդեան մէջ: Արդարեւ, Թուրքիոյ մէջ մեր ժողովուրդը ատելութիւն ու ջարդ տեսաւ. սակայն, ընդհանրապէս արաբական աշխարհի ու յատկապէս Լիբանանի մէջ ան սէր ու կեանք գտաւ: Ահա, թէ ինչու Լիբանանը դարձաւ սիրտը Մփիւռքի հայութեան: Թռչնոց Բոյնի եւ Լիբանանի այլ որբանոցներուն մէջ պատսպարուած մեր որբերը իրենց գործօն մասնակցութիւնը բերին հայ ժողովուրդի վերածննդեան՝ Լիբանանէն սկսեալ մինչեւ ի Մփիւռս աշխարհի»:

Եզրակացնելով իր խօսքը, Վեհափառ Հայրապետը ըսաւ, թէ Թռչնոց Բոյնին մէջ խնամուած ու դաստիարակուած որբերէն Արամ Պեղիքեանի զաւակը Ալեքքօ Պեղիքեան, ահաւասիկ այս թանգարանին բարերարութիւնը ստանձնած է, որպէս յիշատակ իր հօր եւ երախտագիտութիւն՝ Լիբանանին նկատմամբ:

Հանդիսութեան աւարտին, բոլոր հիւրերը ուղղուեցան թանգարանին մուտքը, ուր Նորին Սրբութիւնը հատելով ժապաւէնը բացումը կատարեց որբերու պատմութեան վկայարանին: Ապա, ներկայ պատրիարքները եւ հիւրերը Վեհափառ Հայրապետին ընկերակցութեամբ մօտէն ծանօթացան թանգարանէն ներս ցուցադրուած իրերուն եւ նկարներուն:



## «Վստահություն Չկայ Մեր Իշխանություններուն Նկատմամբ» Կ'ըսէ Գորիկ Յակոբեան

Հայաստանի Ազգային անվտանգութեան ծառայութեան տնօրէն Գորիկ Յակոբեան Չորեքշաբթի օր կառավարութեան նիստին մտահոգություն յայտնեց, որ Հայաստանի մէջ չկայ վստահություն իշխանություններուն նկատմամբ:

Երկրին անվտանգութեան համար պատասխանատու պաշտօնատարը այդպիսի յայտարարություն կատարեց, երբ կառավարութիւնը կը քննարկէր «Նայիրիտ» գործարանի աշխատաւորներու աշխատավարձերու պարտքի վճարման հարցը, որուն կապուած վերջիններս նախանցեալ օր փողոց փակած էին, Չորեքշաբթի օր ալ ցոյց ըրին կառավարութեան շէնքին առջև:

«Չորեքշաբթի հաւաքուածներուն թիւը շուրջ 500 էր: Այսինքն՝ քիչ չէր: Միակ առաջարկը հետեւեալն է. կ'ուզեն դրամը ստանալ մէկ անգամով, բոլորը միասին: Ինչո՞ւ համար կը մտածեն, որ դուք կը վճարէք որոշ թիւով մարդոց եւ դրամը կը վերջանայ: Չկայ վստահություն մեր իշխանություններուն նկատմամբ», ըսաւ Ազգային անվտանգութեան ծառայութեան ղեկավարը:

Վարչապետ Յովիկ Աբրահամեան կառավարութեան Չորեքշաբթի օրուան նիստը բացաւ «Նայիրիտ» գործարանի աշխատաւորներու աշխատավարձերու պարտքը մարելու հարցին անդրադառնալով: Ան յայտարարեց, որ 5 երկիլիոն 310 միլիոն դրամ կազմող ամբողջ պարտքը վճարելու խոստումը կառավարութիւնը պահած է եւ համապատասխան գումարը արդէն իսկ յատկացուցած է:

Ուժանիւթի եւ բնական պաշարներու նախարար Երուանդ Զախարեան տեղեկացուց, որ կառավարութիւնը այսօրուրնէ պիտի սկսի պարտքի մարումը, բայց «Նայիրիտ» գործարանի աշխատաւորները կը շարունակեն բողոքել՝ պահանջելով ամբողջ աշխատավարձը մէկ անգամէն վճարել:

«Եթէ անոնք պատրաստ են սպասելու մինչեւ ամսեվերջ, մենք ամսուան վերջաւորութեան բոլոր վճարումները կրնանք կատարել: Չէ՞ն կրնար սպասել, կ'ըլլան աշխատաւորներ, որոնք կ'ուզեն հիմա ստանալ, մենք պատրաստ ենք այս ընթացքին կատարելու վճարումներ», ըսաւ Զախարեան:

«Թող իրենք որոշեն եւ ներկայացնեն առաջարկները», եզրափակեց վարչապետ Յովիկ Աբրահամեան:

## Լեռնային Ղարաբաղի Բանակը Անհամաչափ Եւ Խիստ Կերպով Հակազդեց Ազրայէճանական Ոտնձգություններուն

Նախանցեալ օր շփման գիծին վրայ ամբողջ օրուան լարուածութենէն ետք գիշերը համեմատաբար հանգիստ անցած է, «Ազատություն» ձայնասփիւռի կայանին հաղորդեց Լեռնային Ղարաբաղի պաշտպանութեան բանակի մամլոյ բանբեր Սենոր Հասրաթեան՝ աւելցնելով, որ պատասխան գործողություններէն ետք հակառակորդը լռած է:

Հասրաթեան չի շտապեր համեմատել սահմանին նախորդ տարուան Յուլիս-օգոստոսի լարուածութիւնը վերջին մէկ շաբթուան ահագնացած կրակոցներուն հետ՝ ընդգծելով, որ նախորդ տարի զինադադարի դրութեան խախտումները կ'ուղեկցուէին նաեւ հետախուզական գործողութեամբ, սակայն «այս պահու դրութեամբ նման բան չկայ»:

«Ազրպեյձանն անընդհատ կը փորձէ միջազգային հանրութեան ցոյց տալ, որ պատերազմական գործողութիւնները տակաւին չեն աւարտած, որ Ազրպեյձան մարտադաշտին վրայ տակաւին ըսելիք ունի», յայտնեց Սենոր Հասրաթեան՝ ընդգծելով, որ Լեռնային Ղարաբաղի պաշտպանութեան բանակը «բոլոր ոտնձգութիւններուն պիտի պատասխանէ անհամարժէք եւ շատ խիստ»:



Ազրպեյձանական զինուժը տարբեր տրամաչափի հրաձգային զինատեսակներէն եւ նոնականետերէն Ասկերանի եւ Մարտունիի ուղղութեամբ կրակ բացած էր:

Չորեքշաբթի օր առաւօտեան հաղորդուեցաւ, որ Հայաստանի պաշտպանութեան նախարար Սէյրան Օհանեան այցելած է սահմանագծոյի հարաւ-արեւմտեան զօրամասերը՝ Նախիջեւանի ուղղութեամբ:

Օհանեանի մամլոյ բանբեր Արծրուն Յովհաննիսեան «Ազատութիւն» ձայնասփիւռի կայանին հետ զրոյցի մը ընթացքին ըսաւ, որ վերջին չորս օրերուն լարուածութիւն կը նկատուի նաեւ Հայաստանի սահմաններուն վրայ, սակայն զինադադարի դրութեան խախտումները Ղարաբաղի եւ Ազրպեյձանի զինեալ ուժերու շփման գիծին վրայ աւելի շատ են:

«Ընդհանուր առմամբ, ամբողջ սահմանագծոյի երկայնքին վերջին օրերուն որոշակիօրէն բազմացած են կրակոցները, բայց ատիկա համեմատել Արցախի Չորեքշաբթի օրուան տուած հաղորդագրութեան հետ կարելի չէ», ըսաւ Արծրուն Յովհաննիսեան:

Արծրուն Յովհաննիսեան ձեռնպահ մնաց պատասխանել այն հարցումին, թէ արդե՞օք Սէյրան Օհանեանի այցելութիւնը սահմանային լարուածութեամբ պայմանաւորուած էր:

Միջազգային եւ անվտանգութեան հարցերու հայկական հիմնարկի նախագահ Ստեփան Սաֆարեանի խօսքով զինադադարի դրութեան յաճախակիացած խախտումները կապուած են ԵԱՀԿ-ի Մինսքի խմբակի համանախագահներու վերջին յայտարարութիւններուն հետ, ըստ որոնց, պէտք է վերականգնել կանոնաւոր բանակցային հոլովոյթը եւ հասնիլ Լեռնային Ղարաբաղի խնդիրի համապարփակ լուծման: Սաֆարեանի կարծիքով, սահմանին վրայ լարուածութիւն ստեղծելով՝ Ազրպեյձան կը փորձէ խափանել բանակցային հոլովոյթը:

«Եւ հասկցէք, որ քանի մը հանգամանք կայ, որոնք Ազրպեյձանի սրտով չեն: Նախ՝ սեղանի վրայ դրուած տարբերակները: Ուորլիքը, երբ կը շօշափէ լուծման այդ տարբերակը եւ կը նշէ, որ բոլոր մանրամասնութիւնները պէտք է քննարկուին համալիր եւ համապարփակ, հասկնանք, որ ասիկա բացարձակապէս ընդունելի չէ Ազրպեյձանի համար, որուն ղեկավարը արդէն բարձրացած է եւ հասարակութեան, եւ իր ախորժակը, հետեւաբար չի կրնար թոյլ տալ, որ քննարկումները շարունակուին այդ տարբերակներուն շուրջ», «Ազատութիւն» ձայնասփիւռի կայանին հետ զրոյցի մը ընթացքին ըսաւ Ստեփան Սաֆարեան:

Յիշեցնենք, որ 20 Յուլիսին ԵԱՀԿ-ի Մինսքի խմբակի համանախագահները Երեւան կը գտնուէին: Ամերիկացի համանախագահ Ճէյմս Ուորլիքը յայտարարեց, որ դարաբաղեան

տագնապի համապարփակ լուծում կարելի չէ առանց Լեռնային Ղարաբաղի ժողովուրդի կամքի ազատ արտայայտման՝ «իբրեւ այդ համապարփակ լուծումի մաս»:

Փորձագետին կարծիքով, Ազրայէճանը պարզապէս շանթաժի կ'ենթարկէ միջազգային հանրութիւնը եւ նման քայլերով կը փորձէ հասնիլ բանակցային հոլովոյթի պայմաններու փոփոխման:

«Ալիեւ կը ցանկայ իր այս անհնազանդութեան քայլերով ուղղակի պարտադրել անոնց, որպէսզի անոնք բաւարարեն իր քմահաճոյքները՝ փոխեն պայմանները», ըսաւ Սաֆարեան:

## **Հակառակորդը 123 Արկ Եւ Խոշոր Տրամաչափի Գնդացրային Միջոցներէ Աւելի Քան 140 Կրակոց Արձակած Է**

Ազրայէճանի զինուած ուժերը 21 Յուլիսի ամբողջ օրուան ընթացքին շարունակած են բռնն կերպով խախտել զինադադարը դարաբաղեան-ազրայէճանական հակամարտ գորքերու շփման գիծի ամբողջ երկայնքով: Ինչպէս կը տեղեկացնէ Լեռնային Ղարաբաղի Հանրապետութեան պաշտպանութեան նախարարութեան մամլոյ ծառայութիւնը, պաշտպանութեան բանակի տուեալներուն համաձայն, նշուած ժամանակահատուածին հակառակորդին կողմէ զինադադարը խախտուած է մօտ 160 անգամ, որուն ընթացքին տարբեր տրամաչափի հրաձգային եւ հրետանային զինատեսակներէ հայ դիրքապահներուն ուղղութեամբ արձակուած են աւելի քան 1600 կրակոցներ, որոնց մէջ՝ 60 միլիմետրոնոց ականանետերէ 123 արկ, «ՌՊԳ-7» տիպի նոնականետերէ 3 արկ եւ խոշոր տրամաչափի գնդացրային միջոցներէ աւելի քան 140 կրակոց:

Պաշտպանութեան բանակի յառաջապահ զօրամասերը դիմած են պատասխան գործողութիւններու, որոնց շնորհիւ հակառակորդի նախայարձակ գործողութիւնները լռեցուցած են:

Լեռնային Ղարաբաղի Հանրապետութեան պաշտպանութեան նախարարութիւնը կը յայտարարէ, որ Արցախի բանակը կը տիրապետէ իրադրութեան եւ իրավիճակի որեւէ զարգացման պարագային պատրաստ է անհամաչափ ու պատժիչ գործողութիւններու:

## **Օհանեան Այցելեց Հարաւ-Արեւմտեան Սահման**

21-22 Յուլիսին Հայաստանի պաշտպանութեան նախարար Մէլրան Օհանեան այցելեց հարաւարեւմտեան սահմանագօտիի զօրամասեր:

Օհանեան նախ այցելեց սահմանային առաջին գիծի տարբեր դիրքեր, տեղւոյն վրայ ծանօթացաւ իրավիճակին, դիրքերուն մէջ տեղի ունեցող մարտավարական եւ ծառայողական փոփոխութիւններուն:

Նախարարը իրեն ուղեկցող բարձրաստիճան հրամանատարներուն հետ քննարկեց զինուորական ծառայութեան եւ կազմակերպչական հարցեր, լսեց անոնց զեկուցումները, տուաւ համապատասխան հրահանգներ:

## **Արցախի Կը Հերքէ «Ազրայէճանական Քարոզչութեան» Տարածած Տեղեկութիւնը**

Լեռնային Ղարաբաղի Հանրապետութեան պաշտպանութեան նախարարութիւնը հաղորդագրութեամբ մը հերքեց «ազրայէճանական քարոզչութեան կողմէ տարածուած

տեղեկությունը», թե ռազմավորձի ընթացքին հակահրասայլային ականի վրայ պայթած է պաշտպանության բանակի երկու հրասայլ:

«Տարածուած տեղեկությունը ընդունեցէք իբրև ազրպէյճանական քարոզչութեան երեւակայութեան արդիւնք», նշուած է Լեոնային Ղարաբաղի պաշտպանութեան նախարարութեան հաղորդագրութեան մէջ:

## **Պելճիքայի խորհրդարանը Սկսած է Հայոց Տեղասպանութեան Բանաձեւի Քննարկումներուն**

News.am կայքը կը հաղորդէ, որ Պելճիքայի խորհրդարանը 22 Յուլիսին սկսած է քննարկել Հայոց ցեղասպանութեան բանաձեւը: Այդ մասին կը հաղորդէ Եւրոպայի Հայ դատի յանձնախումբը:

Պելճիքայի խորհրդարանի Ներկայացուցիչներու տան Բարեփոխական շարժում խմբակցութեան առաջնորդ Տենի Տիւքարմ իր խօսքին մէջ յայտարարած է, թէ վարչապետը յստակ կերպով ըսած է, որ կը ճանչնայ Հայոց ցեղասպանութիւնը: «Անոնք սպաննուեցան, քանի որ հայ էին», հաստատած է ան:

Ընկերվարական Սթեկան Գրուզնյըրը ընդգծած է, թէ իր կուսակցութիւնը միշտ ճանչցած է Տեղասպանութիւնը, սակայն կը կարծէ, թէ պէտք է հաշտութիւն հաստատուի:

Ֆլամանտական ժողովրդական շարժում կուսակցութեան պատուաւոր նախագահ, երեսփոխան Փիթըր տը Ռուվեր ամպլիոն բարձրացած էր անմոռուկով:

Նշենք, որ աւելի կանուխ բանաձեւի նախագիծը ընդունած էր Պելճիքայի խորհրդարանի արտաքին յարաբերութիւններու յանձնախումբը:

## **Եւրոպայի Հայ Դատի Յանձնախումբի Նախագահը Կը Դատապարտէ Սուրուճի Մէջ Տեղի Ունեցած Պայթումը**

Եւրոպայի Հայ դատի յանձնախումբի նախագահ Գասպար Կարապետեան Դաշնակցութեան Եւրոպայի կառոյցին անունով դատապարտած է Թուրքիոյ մէջ տեղի ունեցած պայթումը: «Այս ահաբեկչութիւնը յատկապէս հրէշաւոր է անով, որ Սուրուճի մէջ հաւաքուած երիտասարդները կը պատրաստուէին երթալ Արաբ Բունար եւ իրենց նպաստը բերել քաղաքի վերանորոգման գործին», ըսած է Կարապետեան:



Ան նաեւ շեշտած է, որ ՏԱՀԵՇ ահաբեկչական խմբաւորումը Թուրքիոյ իշխանութիւններուն ցոյց տուած անթաքոյց աջակցութեան արդիւնքն է: «Սուրիոյ մէջ ահաբեկիչներուն աջակցելու՝ Էրտողանի քաղաքականութիւնը ուշ կամ կանուխ իր դէմ պիտի գործէ: Ցաւօք, այսքան անմեղ երիտասարդներու կորուստ եղաւ», ըսած է Եւրոպայի Հայ դատի յանձնախումբի նախագահ Գասպար Կարապետեան:



**ՄԻՋԱԶԳԱՅԻՆ**

# Տիգրանակերտի Մէջ Բախումներ՝ Քաղաքացիներուն Եւ Ոստիկաններուն Միջեւ

«Կազերթա» կայքը կը գրէ, որ Տիգրանակերտ քաղաքին մէջ բախումներ տեղի ունեցած են ոստիկանութեան եւ Սուրուճի մէջ տեղի ունեցած ահաբեկչական յարձակումէն դժգոհող ցուցարարներուն միջեւ:



Ոստիկանութեան ջոկատները յարձակումի ենթարկուած են ցուցարարներուն կողմէ: Ցուցարարները անոնց ուղղութեամբ քարեր եւ այրող նիւթերով շիշեր նետած են, երբ ոստիկանութիւնը կոչ ուղղած է դադրեցնելու ցոյցը:

Բողոքի ցոյցի մասնակիցները ցրուելու համար ոստիկանութիւնը օգտագործած է արցունքաբեր կազ: Քաղաքին մէջ կեդրոնացուած են նաեւ յատուկ ջոկատայիններու լրացուցիչ ստորաբաժանումներ:

## «Պէտք Զէ Միջին Արեւելքի Մէջ Նոր Պատերազմի Մը Մասնակից Դառնանք» Կ'ըսէ Օպամա



Միացեալ Նահանգներու նախագահ Պարաք Օպամա յայտարարեց. «Միացեալ Նահանգներ պէտք չէ ցամաքային ուժեր ուղարկեն Միջին Արեւելք, այլապէս մասնակից կը դառնան շրջանին մէջ նոր պատերազմի մը»:

Փենսիլվենիա նահանգին մէջ բանակի վերականգնման հետ իր ունեցած հանդիպումին ընթացքին Օպամա ըսաւ. «Պէտք չէ Միջին Արեւելքի մէջ դարձեալ ցամաքային մեծ պատերազմի մը մէջ մտնենք: Ատիկա մեր

ազգային անվտանգութեան եւ ուժերուն համար լաւ չէ»:

Ան շրջանին մէջ ՏԱՀԵՇ-ի դիրքերուն դէմ ամերիկեան օդային հարուածներու ազդուութիւնը մատնանշեց: «Ուաշինկթընի ղեկավարութեամբ միջազգային դաշինքին կողմէ ՏԱՀԵՇ-ի դիրքերու ռմբակոծման սկիզբէն ի վեր այդ խմբաւորումը աւելի քան հինգ հազար օդային հարուածներ ստացած է», ըսաւ ան՝ յիշեցնելով, որ իր երկիրը կը մարզէ Իրաքի եւ Սուրիոյ մէջ ՏԱՀԵՇ-ի դէմ կռուող տեղական ուժեր:

Օպամա յայտնեց, որ վերջին ճակատամարտերը ՏԱՀԵՇ-ին վերջ տալու կարելիութիւնը ցոյց տուած են եւ խոստովանեցաւ, որ այժմ զրոյցները մօտալուտ նպատակի մը մասին են, եւ «այդ խմբաւորման վերջ տալուն նկատմամբ կասկած չունինք»:

*ԱՆՂՐԱՂԱՐՁ*

## **Էրտողանի Վերջին Յոյսն Ու Տաւութօղլուի «Ղասայքութեան» Բարիքները**

17 Մայիս 2010-ի Թուրքիոյ եւ Պրագիլի միջնորդութեամբ Իրանի հիւլէական թղթածրարի լուծման «Թեհրանի հոչակագիր»-ի ձախողութենէն 5 տարի եւ «Արաքական գարուն»-ի սկիզբէն 4 տարի ետք, 14 Յուլիսին Թեհրանի հիւլէական թղթածրարի երկարատեւ խնդիրի լուծման Իրան-Վեցեակ համաձայնագիրի կնքումը եկաւ ընդգծելու Թուրքիոյ քաղաքական մեկուսացումը: Այլ հարց, թէ տնտեսական գետնի վրայ Իրանի հետ մասնաւորաբար ուժանիւթի մարզին մէջ համագործակցութեան առիթներ ստեղծեց, ինչ որ ինքնավստահութիւն ներշնչեց Թուրքիոյ եւ զայն մղեց «Թրքական հոսք»-ի ծրագրի հարցին մէջ իր կեցուածքը կարծրացնելով ուժանիւթի նախարար Թաներ Երլտրզի բերնով յայտարարելու. «Մենք երբեք պիտի չկատարենք այնպիսի զիջումներ, որոնք կը սպառնան մեր շահերուն»:

Թուրքիոյ նախկին նախագահ Ապտիւլլա Կիլի՝ իֆթարի մը ընթացքին ներկայ նախագահ Ռեճեփ Թայիփ Էրտողանի ներկայութեան կատարած այն յայտարարութիւնը, թէ Միջին Արեւելքի եւ ընդհանրապէս արաքական աշխարհի նկատմամբ Թուրքիոյ քաղաքականութիւնը պէտք է փոխուի, ցոյց կու տայ, թէ Իրան-Վեցեակ համաձայնութենէն ետք նոյնիսկ իշխող կուսակցութեան մէջ սկսած են տեսնել այդ հրամայականը, սակայն Կիլի խօսքէն ետք Էրտողանի բուն հակադարձութիւնն ու նախկին սերտ գործակիցը անուղղակի կերպով դաւաճան անուանելը եկաւ ցոյց տալու, որ Էրտողան կը յամառի Թուրքիան մեկուսացնող իր քաղաքականութեան վրայ:

Թուրքիոյ մէջ համախոհական կառավարութեան կազմութեան պարագային յստակ է, որ այդ քաղաքականութիւնը պիտի փոխուի, ինչ որ պիտի գայ ընդգծելու Էրտողանի ներքին եւ արտաքին ճակատներու վրայ քաղաքական կատարեալ պարտութիւնը: Այդպիսի կառավարութիւն մը նաեւ Տաւութօղլուի համար ոսկի առիթ մը կրնայ ըլլալ փրկուելու Էրտողանի բռնակալութենէն եւ խամաճիկ մը ըլլալէ դադրելով վերածուելու քաղաքական «անկախ» գործիչի: Ան այդ պարագային ազատութիւն պիտի ունենայ վերակենդանացնելու իր ստեղծած ու ջատագոված «դրացիներու հետ զերօ խնդիրներ» վարդապետութիւնը:

Տաւութօղլուի քաղաքական ողբերգութիւնը այն է, որ ան կը թուի բաւարարուած ըլլալ Էրտողանի կամակատարի դերով: 9 Յուլիսին համախոհական կառավարութեան կազմութեան պարտականութիւնը ստանձնած Տաւութօղլուն իր կուսակիցներուն յորդորեց պատրաստ ըլլալ արտահերթ ընտրութիւններու: Ինչ որ ցոյց կու տայ, որ ընդհանրապէս նպատակ չունի այդ կառավարութիւնը կազմելով Էրտողանը

խալիֆայութենէն գրկելով վերածելու ասանդական եւ պատշիրային պարտականութեան տէր նախագահի մը:

Ահա վերոնշեալներէն մեկնած է, որ Էրտողան կը մերժէ համախոհական կառավարութեան մը կազմութիւնը: Ան կ'ուզէ արտակարգ ընտրութիւններու դիմել այն յոյսով, որ այս անգամ իշխող Արդարութիւն եւ Բարգաւաճում կուսակցութիւնը կրնայ շատ աւելի լաւ արդիւնք մը ձեռք բերել: Ի վերջոյ ան իր բախտը անգամ մը եւս փորձելով ոչինչ ունի կորսնցնելիք: Աւելի լաւ արդիւնքի մը ձեռք բերման համոզումը ունի նաեւ ընդդիմադիր Ազգայնական շարժում կուսակցութիւնը, որ լռելեայն կը դաշնակցի իսլամական կուսակցութեան հետ, կ'օգնէ անոր թեկնածուին խորհրդարանի նախագահ ընտրութեան եւ կը փակէ դուռը համախոհական կառավարութեան մը իր մաս կազմելուն դիմաց: Նշեալ կուսակցութիւնը նաեւ յոյս ունի, որ Ժողովուրդներու ժողովրդավարական կուսակցութիւնը աւելի վատ արդիւնք մը ձեռք կը բերէ, ինչ որ «Գորշ գայլեր»-ու քաղաքական թեւին համար դարձեալ դրական արդիւնք մը կը նկատուի: Քրտամէտ կուսակցութեան հետ կառավարութեան կազմութիւնը իշխող կուսակցութեան կողմէ բացառուած ըլլալուն պատճառով Հանրապետական ժողովուրդի կուսակցութիւնը ինքզինք կը գտնէ մինակ, դժկամ բանակցողի մը դէմ յանդիման: Քեմալական կուսակցութիւնը ո՛չ կրնայ հակառակորդէն զիջումներ ձեռք բերելու համար իր պահանջներու նշանակը բարձրացնել, ո՛չ ալ զայն վար առնել, որովհետեւ այդ պարագային կառավարութեան մասնակցութիւնը կը դառնայ անիմաստ եւ քաղաքական անձնասպանութեան համագոր քայլ մը:

Ներկայ պայմաններուն մէջ կը թուի, թէ Թուրքիա կ'ուղղուի դէպի արտակարգ ընտրութիւններ: Կը մնայ տեսնել, թէ Կիւլ եւ այլ համախոհներ պիտի կարենա՞ն Տաւրթողլուն մղել վայելելու «դասալքութեան» բարիքները:

ՎԱՀՐԱՍ ԷՍՄԻԵԱՆ

*Ձուր եմ փախչում, ինձ խաբում,*

*Հազար կապ է ինձ կապում.*

*Ամենքի հետ ապրում եմ,*

*Ամենքի չափ տառապում:*

*Յովհաննէս Թումանեան*

**ԱԿՆԱՐԿ**

**Ո՞վ է «Թուրքիոյ Ազգային Միասնականութիւն»-ը  
Հարուածողը**

Սուրուճի գործողութիւնը Թուրքիոյ տարածքին կատարուած միջադէպերէն եւ ոմբահարումներէն կ'առանձնանայ եւ նոր իրավիճակի մը նախաբանի հանգամանքը կը ստանայ հետզհետէ:



«Իսլամական պետութիւն» ընդդէմ քրտական ուժեր պատերազմը կը տարուէր թրքական սահմաններէն դուրս, յատկապէս Իրաքի եւ Սուրիոյ մէջ: «Իսլամական պետութեան» կողմէ քրտական կեդրոնին դէմ իրականացած յարձակումը Սուրուճի մէջ պատերազմի տեղափոխութեան լուրջ նախադրեալ կրնայ նկատուիլ: Եւ այստեղ անտեղի չեն այն բոլոր վարկածները, որոնք կը կեդրոնանան Թուրքիոյ կողմէ ստեղծուած «Իսլամական պետութեան» վերահսկողութենէ դուրս գալուն եւ թէկուզ քրտական ուժեր հարուածելու նպատակով նոյնինքն թրքական շահերը հարուածելու իրողութեան վրայ:

Քաղաքական տրամաբանութեամբ անհաւանական պէտք չէ նկատել նաեւ այն, որ մահապարտին Սուրիայէն Թուրքիա թափանցած ըլլալը սահմանային գօտիներու անվտանգութեան նպատակով Անգարայի ծրագիրներուն կրնայ յագուրդ տալ կամ նոյնիսկ արդարացնել թրքական ներխուժումը Սուրիա՝ ահաբեկիչներու Թուրքիա անցումը կանխարգիլելու յայտարարութեամբ:

Այս առումով մինչ այժմ Թուրքիայէն Սուրիա ահաբեկիչներու անարգել հոսքին մասին էր խօսքը. բնականաբար հակառակ ուղղութեամբ ալ կ'աշխատէր ահաբեկիչներու անցք տրամադրող թրքական կամուրջը. սակայն տարբերութիւնը այս պարագային այն է, որ Թուրքիա վերադարձողը այս անգամ գործողութիւն կը կազմակերպէ նաեւ Թուրքիոյ մէջ:

Ամերիկեան զգուշացումները Անգարային սկսած են ձեւ ու մարմին ստանալ. Իսլամական պետութիւնը այն գործիքն է, որ զինք սնողին դէմ կրնայ աշխատիլ, երբ աւելի մեծ կեդրոններէ յղուին համապատասխան ազդանշանները:

Դժուար կացութիւններու առջեւ կանգնած պաշտօնական Անգարային համար երեսփրկութեան (face saving) յատկանիշով բնութագրուող յայտարարութիւն է այն, որ



Սուրուճի յարձակումին թիրախը Թուրքիոյ ազգային միասնութիւնն էր: Թուրքիոյ վարչապետի պաշտօնակատարին այս յայտարարութիւնը քիւրտերը բացառապէս Թուրքիոյ քաղաքացիները կը նկատէ, որոնք այս տրամաբանութեամբ թրքական ազգին կարեւոր բաղադրատարրեր են: Միեւնոյն յանկերգն է, որ կ'օգտագործուի նաեւ այս պարագային. Օսմանեան կայսրութեան



ժողովուրդները, այսօրուան Թուրքիոյ քաղաքացիները, համատեղ բնօրրանին մէջ ապրողները: Միեւնոյն ազգը նկատելով քիւրտերը, վարչապետի պաշտօնակատարը սակայն կատարած է երկրորդ յայտարարութիւն մը. ընդունած, որ Թուրքիոյ ազգային միասնութիւնը (թէկուզ իրենց պատկերացումով) այսօր վտանգուած է: Ասիկա յար եւ նման է նախագահ Էրտողանի նախընտրական ճառին, ուր ընդգծուած էր Թուրքիոյ մասնատման վտանգին առկայութիւնը՝ դարձեալ շեշտելով, որ արեւմտեան լրատուամիջոցներն ու հակաիշխանական որոշ ուժեր կը սպառնան Թուրքիոյ տարածքային ամբողջականութեան:

Տաւութօղլուի տրամաբանութեան սահմաններուն մէջ մնալով կը հետեւի այն, որ թուրք ազգին միասնականութիւնը խախտողները «Իսլամական պետութեան» խմբաւորումներն են: Հասցեագրումը ուղղակի չէ թրքական կողմէն. ըստ լրատուութիւններուն, տակաւին կը ստուգուին անձնասպանական գործողութեան հեղինակին «Իսլամական պետութեան» հետ ունեցած ենթադրեալ կապերը: Անգարան ուրեմն ցարդ պաշտօնապէս չէ ամբաստանած «Իսլամական պետութիւն»-ը՝ անձնասպանական գործողութեան ետին կանգնած ըլլալու յանցանքով:

Անկախ այն իրողութենէն, որ ՔԱԿ-ի զինուորական գործողութիւններու վերաձեռնարկելու որոշակի տուեալներ կ'առարկայանան, պէտք է ըսել, որ «Իսլամական պետութիւն» – քրտական ուժեր պատերազմը, որ խորքին մէջ Թուրքիա-Քիւրտիստան պատերազմ է, ըստ էութեան կրնայ որոշ դիմափոխութիւն ունենալ ոչ միայն աշխարհագրական վայրի փոփոխութեամբ:

Սուրուճը եթէ իրօք նախաբան է, այս կը նշանակէ, որ Թուրքիոյ տարածքին «Իսլամական պետութիւն»-ը պիտի փորձէ հարուածել քրտական կեդրոններ: Իսկ քրտաբնակ շրջաններէն կարեւոր մաս մը պատմական առումով ունին յստակ պատկանելիութիւն:

«Ա.»

**ԼՈՒՐԵՐ ԳԱՂՈՒԹՆԵՐԷՆ**

**Ատրպատականի Ազգային Առաջնորդարանի Պատմական Շէնքի Լուսաւորման Հանդիսութիւն**

Յունիս 21-ին, ամրան շրջանին համար պաշտօնական բացումը կատարուեցաւ Ազգային առաջնորդարանի զբօսայգիին:

Նոյն օրը, երեկոյեան, Ազգային առաջնորդարանի շէնքին առջեւ տեղի ունեցաւ իւրայատուկ հանդիսութիւն մը՝ լուսաւորելու համար պատմական շէնքը, որ շուրջ 200 տարուան հնութիւն ունի:

Բացման խօսքով հանդէս եկաւ Ազգ. առաջնորդարանի պաշտօնէաներէն Ռիթա Նազարբեկեանը, որ շեշտեց առաջնորդարանի զբօսայգիի ունեցած կարեւոր դերակատարութիւնը համայնքի կեանքէն ներս՝ իբրեւ ամառնային շրջանի ժողովրդական հաւաքատեղի:

Ատրպատականի հայոց թեմի առաջնորդ Գրիգոր եպս. Չիֆթճեան պատմական ակնարկ մը նետեց շէնքի անցեալին: Ապա ան բարձր գնահատեց հանգուցեալ գնդապետ եւ Ատրպատականի հայոց թեմի կեանքէն ներս մեծ վաստակ ունեցող Էմիլ Յակոբեանի թարիզաբնակ եւ ամերիկաբնակ զաւակները, որոնք ի յիշատակ իրենց ծնողներուն՝ ստանձնած էին շէնքի լուսաւորման բոլոր ծախսերը:

Ապա Թարիզի հոգեւոր հովիւ Առաքել քինյ. Տնտմեան կարդաց առաջնորդ սրբազան հօր գնահատանքի գիրը՝ ուղղուած Յակոբեան ընտանիքի անդամներուն՝ Աստղիկ, Գասպար, Անահիտ եւ Մելքոն Յակոբեաններուն: Աւարտին սրբազան հայրը զայն պաշտօնապէս յանձնեց Յակոբեան ընտանիքի ներկայացուցիչ Անահիտ Յակոբեան-Մելիքեանին:

Այնուհետեւ, սրբազան հօր ձեռամբ, հեռակառավարուող գործիքով հերթաբար լուսաւորուեցան շէնքին տարբեր մասերը:

Աւարտին գործադրուեցաւ գեղարուեստական յայտագիր:

**Կիպրահայ Համայնքը Կ'աջակցի Արցախի Մէջ Համակարգչային Գիտելիքներու Զարգացման**

Վերջերս, նախաձեռնութեամբ եւ ֆինանսաւորումով «Հայաստան» համահայկական հիմնադրամի Կիպրոսի տեղական մարմինին, համակարգչային լսարաններ հիմնուեցան Արցախի Քարվաճառ շրջանի հինգ համայնքային դպրոցներու մէջ՝ իւրաքանչիւրին նուիրելով վեց համակարգիչ եւ անհրաժեշտ կահոյք: Պետական միջոցներով վերանորոգուեցան նաեւ սենեակները:



Հիմնադրամի Կիպրոսի տեղական մարմինի ատենապետ Սեպուհ Դաւիթեան գոհունակութիւն յայտնեց, որ իրենց փոքրաթիւ համայնքը նոյնպէս կրցաւ օժանդակել արցախցի պատանիներուն:

## Համահայկական 6-րդ Խաղերու Չահի Հրավառութիւն

Յուլիս 12-ին, Կլենտլի Ս. Աստուածածին եկեղեցոյ շրջափակին կողքին կանգնած Նահատակաց յուշարձան-խաչքարին առջեւ տեղի ունեցաւ Համահայկական 6-րդ Խաղերու ջահի հրավառութեան խորհրդանշական արարողութիւնը՝ ձեռամբ թեմի առաջնորդ Մուշեղ արք. Մարտիրոսեանի: Խաղերը տեղի պիտի ունենան 2-13 օգոստոս, Հայաստանի մէջ: Առաջնորդ սրբազանը խօսք առնելով՝ ողջունեց Համահայկական Խաղերու կազմակերպիչները, զանոնք հովանաւորող հայրենի իշխանութիւնները եւ մասնակից մարզիկները:



Ան նկատել տուաւ, որ այս տարուան Խաղերը կը զուգադիպին Յեղասպանութեան 100-ամեակին, հետեւաբար ունին խորհրդանշական իմաստ եւ կը մարմնաւորեն հայ երիտասարդութեան միացեալ կեցուածքը՝ «Կը յիշեմ ու կը պահանջեմ» կարգախօսին յանձնառութեամբ ու հայրենիք-սփիւռք միասնութեան մարմնաւորումով:

Յայտնենք, որ սրբազանը ջահը վառելէն ետք զայն յանձնեց մարզիկի մը, որ արարողութեան աւարտին զայն բարձր բռնած՝ Կլենտլի փողոցներով հասցուց Հայաստանի հիւպատոսարան, ուր եւս արտասանուեցան ողջոյնի խօսքեր:

Հարկ է նշել, որ ջահի հրավառութեան արարողութիւնը տեղի ունեցած էր նաեւ 28 յունիսին, Անթիլիասի Մայր տաճարի կողքին կանգնած Նահատակաց մատուռ-յուշակոթողին առջեւ, ձեռամբ Արամ Ա. կաթողիկոսի, ներկայութեամբ հայրենի եւ Լիբանանի հայութեան մարզական ներկայացուցիչներու:

## Անգլիագիր Հայ Գրող Յակոբ Խաչիկեան Մահացած Է



Մոնրեալի մէջ իր մահկանացուն կնքեց անգլիագիր հայ գրող Յակոբ Խաչիկեանը: Պուլիս ծնած Խաչիկեան (1931) իր նախնական կրթութիւնը ստացած է Վիեննայի Մխիթարեան վարժարանին մէջ: Պատմաբան Խաչիկեան, կարեւոր ուսումնասիրութիւններ կատարելէ անդին, հեղինակ է 20-է աւելի հատորներու: Անոր կոթողային գործերէն կը համարուին «Վաղորդայն չունեցող արշալոյսը» եւ «Ամառ առանց այգաբաց»-ի (համահեղինակութեամբ Ժան Իվ Մուսիի) վէպերը: Հեղինակն է նաեւ «Մոխրագոյն զգեստով երիտասարդ մարդը» (The Young Man in the Gray Suit),

«Չառաքուած նամակներ» (Un-mailed Letters), «Իմ ցեղային հարցը» (My Ethnic Quest) հատորներուն: Խաչիկեան բազմիցս այցելած է Հայաստան: Ան արժանացած է «Ս. Սահակ – Ս. Մեսրոպ» շքանշանին:

[WWW.AZTAGDAILY.COM](http://WWW.AZTAGDAILY.COM)

**ԿՆՈՋԱԿԱՆ**

**Վարունգի Հիւթին 6 Բարիքները**

**Վարունգի հիւթը կենսասնիթերով եւ հանքայիններով հարուստ, աժան եւ մատչելի դեղ է մեր առողջութեան համար. ստորեւ կը ներկայացնենք անոր 6 հիմնական բարիքները:**

**-1-** Վարունգին հիւթը կ'օգնէ կանխարգիլելու սրտանօթային որոշ անհանգստութիւններ: Անիկա առատ փոթասիտ կը պարունակէ, իսկ այս վերջինը յայտնի է արեան ճնշումը պակսեցնելու իր յատկութեամբ:

Վարունգի հիւթը նաեւ կը պարունակէ փանկրէասին անհրաժեշտ նիւթ մը, որ կ'օգնէ էնսիւլինի արտադրութեան, եւ բնականաբար անիկա յանձնարարելի է շաքարախտաւորներուն:

**-2-** Ջուրով եւ բնաթելով հարուստ վարունգի հիւթը կը բարելաւէ մարսողական դրութեան գործունէութիւնը եւ կը կանխարգիլէ պնդութիւնը:

**-3-** Քիչ ջերմութ եւ ըստ ջուր պարունակող վարունգի հիւթը միզեցնող է եւ յանձնարարելի՝ նիհարցնող սննդականոնի հետեւողներուն:



**-4-** Վարունգի հիւթը *սիլիս* կը պարունակէ, այս վերջինը կը զօրացնէ հիւսկէնները, մկանները, ջիւերը (tendons), կապանները (ligaments) եւ աճառները (cartilages): *Սիլիս* նաեւ հակաբորբոքային յատկութիւն ունի եւ յանձնարարելի է *արթորոզ* տառապողներուն:



**-5-** Վարունգը եւ անոր հիւթը չափազանց օգտակար են մորթին:

Ջուրով, էօ. կենսասնիթով եւ հիմնական իւղերով հարուստ այս խմիչքը կը կանխարգիլէ մորթին կանխահաս ծերացումը, կը չէզոքացնէ աչքերուն տակի մութ գոյնը, փայլ եւ առողջ տեսք կու տայ դէմքին:



**-6-** Ա. Պէ. եւ Սէ. կենսասնիթերով հարուստ վարունգը կը խթանէ մարմնին դիմադրականութիւնը: Օրական բաժակ մը վարունգի հիւթ խմելով՝ բնական ձեւով կը զօրացնէք ձեր դիմադրականութիւնը:

**Վարունգի Հիւթի Պատրաստութիւն**

Եթէ այս յօդուածը ձեզ համոզեց եւ վարունգի հիւթ պիտի խմէք, ընտրեցէք մութ գոյնի, մստ վարունգներ եւ անգամ մը որ հիւթը ստացաք անմիջապէս խմեցէք, քանի որ բոլոր հիւթերուն նման՝ անիկա կը կորսնցնէ իր սննդական արժէքին մէկ կարելոր մասը օդին եւ լոյսին պարզուելով: Նաեւ կարելոր է, որ վարունգը քամէք իր կեղեւով, տրուած ըլլալով, որ Սէ. կենսասնիթին մէկ կարելոր տոկոսը հոն կը գտնուի: